



Baština Akademije nauka i umjetnosti Bosne i Hercegovine

**Simpozijum Bespravna stambena izgradnja i njen
odraz na funkcionalni i prostorni razvoj gradova u
Bosni i Hercegovini: 16. i 17. decembar 1971. godine**

Finci, Jahiel

1972

Akademija nauka i umjetnosti Bosne i Hercegovine

<https://bastina.anubih.ba/items/580fad4d-6e49-4223-b461-4ddd89fdcb92>

Preuzeto s Baštine Akademije nauka i umjetnosti Bosne i Hercegovine

<https://bastina.anubih.ba/>

AKADEMIJA NAUKA I UMJETNOSTI BOSNE I HERCEGOVINE

POSEBNA IZDANJA

KNJIGA XX

ODJELJENJE TEHNIČKIH NAUKA

KNJIGA 4.

SIMPOZIJUM

BESPRAVNA STAMBENA IZGRADNJA I NJEN ODRAZ NA FUNKCIONALNI I PROSTORNI RAZVOJ GRADOVA U BOSNI I HERCEGOVINI

16. i 17. decembra 1971. godine



Urednik
JAHIEL FINCI,
redovni član Akademije nauka i umjetnosti
Bosne i Hercegovine

SARAJEVO

1972

POZDRAVNA RIJEČ AKADEMIKA JAHIELA FINCIJA

Cijenjeni i poštovani drugovi i drugarice,

U ime Organizacionog odbora otvaram Simpozijum i pozdravljam sve prisutne.

Tema Simpozijuma je »Bespravna stambena izgradnja i njen odraz na funkcionalni i prostorni razvoj gradova u Bosni i Hercegovini«.

Možda bi adekvatniji bio naslov »Bespravna stambena izgradnja i njen odraz na uređenje prostora«, s obzirom da se bespravna izgradnja ne vrši samo u gradovima i na njihovim prilazima, već se vrlo intenzivno vrši i razvija duž saobraćajnica, a posebno duž magistralnih puteva.

Naslov »Bespravna stambena izgradnja i njen odraz na funkcionalni i prostorni razvoj gradova u Bosni i Hercegovini« na izvjestan način usmjerava na urbanističke aspekte ovog problema. Međutim, u referatima i saopštenjima koji će ovdje biti podneseni, i to ne samo od strane urbanista i arhitekata već i sociologa, društveno-političkih radnika, pravnika i drugih — izražena je želja da se taj problem sagleda i iz drugih aspekata.

Pitanje bespravne stambene izgradnje pokrenula je ova institucija još prije dvije godine, kada smo u vezi s ovim držali i konsultativni sastanak. Moram istaći da je inicijativa Akademije o sazivanju ovog sastanka naišla na veoma dobar prijem. Prisutni su jednoglasno prihvatili prijedlog o organizovanju simpozijuma na kojem bi problem bio razmatran mnogo šire, sa više strana i od većeg broja stručnjaka.

Sada možemo sa sigurnošću konstatovati da je održavanje ovog Simpozijuma bilo neophodno s obzirom da je posljednjih godina bespravna stambena izgradnja uzela krajnje i apsolutno zabrinjavajuće razmjere u gradovima Bosne i Hercegovine.

Danas, kada ovaj Simpozijum održavamo, uvjereni smo da će predstavnici raznih struka i naučnih oblasti čija je djelatnost vezana za ovaj problem, u referatima, saopštenjima i u neposrednoj razmjeni mišljenja naći najpogodnije puteve za što uspješnije rješavanje brojnih problema bespravne stambene izgradnje.

Simpozijum ima za cilj da pronalazira različite elemente ove složene pojave i da utvrdi međuovisnost različitih uticaja društveno-eko-

nomskih zbivanja, što bi moglo da predstavlja osnovu za utvrđivanje politike rješavanja bespravne stambene izgradnje. Istovremeno bi trebalo da utvrdi da li uopšte postoje vidovi za konkretno i dugoročno rješavanje tog problema i koji su to vidovi.

Pored stručnjaka-poznavalaca tog problema iz Bosne i Hercegovine koji će podnijeti svoje referate ili saopštenja, zamolili smo i izvjestan broj stručnjaka van naše Republike da iznesu svoja zapažanja i iskustva u rješavanju ovog problema u njihovim gradovima.

Tako smo zamolili druga Zdenka Kolacija iz Zagreba, koji je, na žalost, u posljednjem momentu bio spriječen da prisustvuje, zatim druga Miloša Savića iz Novog Sada i druga Đuru Đurovića iz Beograda da nas upoznaju sa problemom bespravne stambene izgradnje i načinom rješavanja tog problema u njihovim gradovima.

Referat će podnijeti i drug Miroslav Živković, sociolog u Jugoslovenskom institutu za urbanizam i stanovanje u Beogradu, jedan od vrlo dobrih poznavalaca tog problema.

Simpozijumu prisustvuju eminentni stručnjaci iz Bosne i Hercegovine, čija će saradnja u radu ovog Simpozijuma biti veoma dragocjena s obzirom da se oni niz godina bave ovim problemom, zatim predstavnici naših uglednih institucija iz oblasti društvenih, političkih, socioloških, zdravstvenih i urbanističkih nauka. (Tako prisustvuju predstavnici Pravnog, Medicinskog, Ekonomskog, Arhitektonsko-urbanističkog i Fakulteta političkih nauka, Ekonomskog instituta, Instituta za društvena istraživanja, Zavoda za privredno planiranje itd.).

Simpozijumu prisustvuju predstavnici društveno-političkih organizacija: Republičke konferencije SSRN, Republičke konferencije Saveza sindikata Bosne i Hercegovine, Gradske konferencije SSRN, te Privredne komore Bosne i Hercegovine.

Dalje, Simpozijumu prisustvuju predstavnici skupština opština većih gradova Bosne i Hercegovine i nekih manjih mjesta u kojima se taj problem posebno ispoljava, predstavnici skupštinskih odbora Skupštine SRBiH, Republičkog sekretarijata za urbanizam, stambena i komunalna pitanja Izvršnog vijeća SRBiH, Republičke građevinske inspekcije i Republičkog putnog fonda.

Simpozijumu prisustvuju i predstavnici urbanističkih zavoda, kao i predstavnici nekih većih stambenih i građevinskih preduzeća.

Drago mi je što mogu iznijeti da su se odazvali pozivu i da Simpozijumu prisustvuju predstavnici Urbanističkog Zavoda grada Beograda, Urbanističkog zavoda Ljubljane i Urbanističkog zavoda za Dalmaciju —Split. Ja ih molim da se osjećaju kao domaći i da aktivno sudjeluju u radu.

Nismo bili u mogućnosti da iz drugih republika pozovemo veći broj gostiju, a isto tako nismo pozvali možda još mnoge druge koje zanimaju ova pitanja i ovaj problem. Smatrali smo da je ovaj broj dovoljan za uspješno raspravljanje, a da, s druge strane, nije velik i da nema bojaznosti da se ovaj naučni skup pretvori u manifestaciju.

Referati su na izvjestan način podijeljeni u četiri grupe, bez obzira na činjenicu što se uvijek radi o istoj temi. Prvu grupu referata

sačinjavaju razmatranja koja nisu usko vezana za bosansko-hercegovačku problematiku. Druga grupa referata tretira problem bespravne izgradnje vezan sa stanjem u Bosni i Hercegovini, treću grupu sačinjavaju izlaganja naših gostiju iz Novog Sada i Beograda, a u četvrtoj grupi nalaze se dva referata: jedan je vezan za Sarajevo, to jest za grad u kojem problem bespravne izgradnje svakim danom dobiva sve veće dimenzije, a drugi je vezan za Mostar, gdje je ta pojava u opadanju.

Svi referati, saopštenja i diskusije biće štampani u materijalima Simpozijuma.

Prema odluci Akademije radom Simpozijuma rukovodiće akademik Julije Hahamović, dopisni član akademije Mustafa Kamarić i akademik Jahiel Finci.

Sada mi dozvolite da zamolim akademika prof. dra Julija Hahamovića, člana Predsjedništva Akademije, da rukovodi prvom sjednicom Simpozijuma.

